



Par le vouloir, Pharaon avec son peuple est molesté des poux & des mouches, afin qu'il laissast aller Israël pour sacrifier.

SVIVANT le commandement de Dieu, Moïse & Aaron frapperent de la verge la poudre de la terre, qui fut conuertie en poux, qui asprement molestoient les hommes & les bestes d'Egypte. Autant en voulurent faire les Deuins par leurs enchantemens, mais ils ne pûrent. Lors ils dirent à Pharaon, Icy est le doigt & la vertu de Dieu : Mais Pharaon demeura obstiné, Item, le Seigneur enuoya Moïse deuant Pharaon, qui luy dit, Laisse aller Israël pour sacrifier, ou tu verras sur toy & les tiens vne meslée de mouches dont les maisons des Egyptiens seront remplies. Mais en ce jour-là sera séparée la terre de Gessen, en laquelle se tient le peuple de Dieu, qui sera exempt de cette méléed de mouches, & ce afin que tu connoisses la difference d'entre le peuple de Dieu & le tien ; & demain se fera ce signe. Et le Seigneur fit ainsi : Ce que voyant Pharaon dit, Allez sacrifier à vostre Dieu, mais que ce soit en ce païs. A quoy Moïse répondant, dit, Qu'il n'estoit conuenable, d'autant que leur sacrifice estoit estimé abomination aux Egyptiens : mais nous conuient aller trois iours au desert. Et Pharaon dit à Moïse, Prie pour moy, à ce que la meslée des mouches se retire. Et Moïse dit, Je le feray, mais ne nous abuser plus. Lors Moïse se retira & pria Dieu, & la meslée des mouches se departit ; mais Pharaon endurcist encore son cœur.

Exode Chap. 8.